

# Memia bleras dumondas anc senza risposta

CUN CORSIN FARRÉR HA DISCURRÌ  
FLURIN ANDRY / ANR

■ **La regenza grischuna propona d'edir a partir da l'onn 2005 per las scolas rumantschas mo pli meds d'instrucziun en rumantsch grischun. La fracziun rumantscha dal cussegl grond cun lur president Corsin Farrér (pcd, Alvaschagn), s'è fatga ils emprims pattratgs areguard quest'intenziun.**

*Tge consequenzas per la Rumantschia ha a Voss avis la decisiun da la regenza ed er dal cussegl grond da stampar bainbaud meds d'instrucziun mo pli en rumantsch grischun?*

## **La magistraglia sto esser preparada**

Corsin Farrér: Igl è uschia ch'il parlament ha decis glindesdi dad ir oramai quella via e d'edir dal 2005 davent meds d'instrucziun mo pli en il rumantsch standardisà e betg pli en ils singuls idioms. Quai ha baud u tard per consequenza ch'il rumantsch grischun vegn introduci en scola. L'instrucziun en nossas scolas vegn ad esser



tegnida damai en rumantsch grischun. Tge consequenza che quai vegn ad avair per ils idioms, quai vegn a sa musar anc.

**Co vesais Vos il potenzial da spargn en quel sector?**

Esser èsi uschia che tar il pachet che nus trattain en questa sessiun na sa tracta i betg mo d'in pachet da spargn, mabain er d'ina examinaziun da las

structuras. Qua sa tracti dad ina revisiun da las structuras. Il potenzial da spargn tar quella mesira è primarmain fitg pitschen. A lunga vista, cur che la mesira è realisada, è il potenzial da spargn franc avant maun.

**Pertge è el a curta vista fitg pitschen?**

La magistraglia ha anc da vegnir scolada per pudair instruir en rumantsch grischun. Quai occasiunescha er divers custs.

**Vus avais crititgà ch'i manchia anc in concept per introducir ils meds d'instrucziun en rumantsch grischun. Tge concept proponissas Vos?**

## **In pass en la dretga direcziun**

Jau vegn a pretender en mes votum per mauns dal protocol da la regenza che nus da la fracziun rumantscha, pia las deputadas ed ils deputads rumantschs, giavischian in concept cler e definà. La mesira sco preschentada lascha avert numnadamain bler memia bleras dumondas per il mument. Jau sun in zic

dischillusiunà che la regenza n'è betg entrada, n'ha betg prendì posiziun sin quel giavisch durant la debatta da glindesdi. Durant questa sessiun vegn jau ad inoltrar ina intervenziun persunala e a pretender in tal concept.

## **Bleras dumondas anc avertas**

**Co duess vegnir realisada tenor Vos l'introducziun dals meds d'instrucziun en rumantsch grischun?**

Quai è er ina dumonda che duai vegnir respundida en il concept pretendì.

**E co vegn organisada la scolaziun da las magistras e magisters per ch'els possian instruir cun ils meds en il rumantsch da scrittira?**

Quai è ina da las dumondas essenzialas che quel concept ha da responder: Nus stuain esser segirs che la magistraglia saja preparada suffizientamain fin il 2005, cur ch'i duessan vegnir utilisads mo pli meds d'instrucziun en rumantsch grischun. Perquai exista ina tscherta pressiu da temp. E quai ch'ins

na dastga betg emblidar, nus avain er da savair motivar ils scolasts per quel pass. Il chantun ha da prestar anc grond lavur da persvasiun.

**Vegn il chantun a metter a disposiziun tants meds finansials sco per la scolaziun da la magistraglia en talian?**

## **Ins sto anc motivar ils scolasts**

Er quai è ina dumonda che vegn tschentada en il postulat che jau fetsch a la regenza. Jau sun londervi a rimnar vuschs per sustegnair quell'incumbensa, e jau sun persvas da nun avair nagina difficultad da chattar il sustegn basegnà.

**E co è Vossa tenuta persunala areguard il rumantsch grischun en scola?**

Mia opiniun persunala è ch'il pass va en la dretga direcziun, però oz èn sco ditg avertas anc memia bleras dumondas. E quai che disturba mai in zic è ch'ins decida ina tala mesira en connex cun il pachet da spargn actual, quai nun è senz'auter da beneventar.